



**«ԵՎՐՈՊԱԿԱՆ ԵԿԵՂԵՑԻՆԵՐԻ ԿՈՆՖԵՐԱՆՍԻ»
ԳԼԽԱՎՈՐ ՔԱՐՏՈՒՂԱՐ ԴՈԿՏՈՐ ԳԼԵՆ ԳԱՐՖԻԼԴ
ՎԻՋԱՄՍԻ ԱՅՑԵԼՈՒԹՅՈՒՆԸ ՄԱՅՐ ԱԹՈՒ**

Սույն թվականի սեպտեմբերի 13—15 օրերին պաշտոնական այցով Մայր Աթոռում էր գտնվում «Եվրոպական Եկեղեցիների Կոնֆերանսի» գլխավոր քարտուղար դոկտ. Գլեն Գարֆիլդ Վիլյամսը՝ իր տիկնոջ հետ:

Սեպտեմբերի 14-ին, կիրակի օրը, առավոտյան ժամը 10.30-ին, Վեհարանի իր ընդունարանում Ամենայն Հայոց կաթողիկոսն ընդունեց Մայր Աթոռի պատվարժան հյուրին և զրույց ունեցավ նրա հետ:

Զրույցն անցավ եղբայրական ջերմ ու սրտագին մթնոլորտում: Դոկտոր Վիլյամսի և Հայոց Հայրապետի միջև փոխանակվեցին հուշանվերներ:

Նույն օրը հարգարժան հյուրն իր տիկնոջ հետ Մայր տաճարում ներկա եղավ սուրբ պատարագի արարողությանը: Ս. պատարագը մատուցեց Տ. Արսեն եպիսկոպոսը: Պատարագից հետո Մայր Աթոռի վանական սեղանատանը Հայոց Հայրապետը հյուրերի պատվին տվեց ճաշկերույթ:

Սեպտեմբերի 15-ին, երկուշաբթի օրը, ժամը 16-ին, դոկտոր Վիլյամսը քաղաքավարական այցելություն տվեց Հայկական ՍՍՀ Միմիստրների խորհրդին առընթեր Հայ Եկեղեցու գործերի խորհրդի պաշտոնատեղի և ընդունվեց խորհրդի նախագահի տեղակալ տիար Անդրանիկ Հասրաթյանի կողմից: Մայր Աթոռի մեծարգո հյուրի և պրն. Անդրանիկ Հասրաթյանի միջև տեղի

ունեցավ զրույց: Զրույցին ներկա էին Մայր Աթոռի դիվանապետ Տ. Արսեն եպս. Բերքերյանը և Մայր Աթոռի Միջեկեղեցական հարաբերությունների բաժնի ընդհանուր քարտուղար Պարզև Ծախազյանը:

Մայր Աթոռում գտնվելու օրերին դոկտ. Վիլյամսն այցելեց Ս. Հովհաննես, Ս. Գալանե, Ս. Գեղարդ պատմական վանքեր, Հայ Առաքելական հուշարձան՝ Ծիծեռնակաբերդում, եղավ Ս. Մեսրոպ Մաշտոցի անվան պետական Մատենադարանում, ուր նրան ջերմորեն ընդունեց Մատենադարանի տնօրեն ակադեմիկոս Լևոն Խաչիկյանը:

Սեպտեմբերի 15-ին, երկուշաբթի օրը, երեկոյան, «Եվրոպական Եկեղեցիների Կոնֆերանսի» գլխավոր քարտուղարը հրաժեշտ տվեց Մայր Աթոռին և մեկնեց Թբիլիսի, որպես Վրաց Եկեղեցու հյուրը:

«Եվրոպական Եկեղեցիների Կոնֆերանսը», որի կենտրոնը գտնվում է Ժնևում, Եկեղեցիների համաշխարհային խորհրդի հետ սերտորեն գործակցող, բայց նրանից անկախ գործող եկեղեցական մի կազմակերպություն է, որի կազմում ընդգրկված են 113 անդամ Եկեղեցիներ եվրոպական շուրջ 25 տարբեր երկրներից: Հայ Առաքելական Եկեղեցին մի քանի տարուց ի վեր անդամակցում է վերոհիշյալ կազմակերպությանը: